

四庫全書

集部

欽定四庫全書

集部

范洛集卷十五

六

詳校官庶吉士_臣李如筠

中書_臣劉源溥覆勘

總校官原任_臣王燕緒

校對官中書_臣溫汝适

謄錄監生_臣歐陽愛

欽定四庫全書

苑洛集卷十五

薦舉地方賢才事

明 韓邦奇 撰

謹題為薦舉地方賢才事臣惟人才之生也固有數其
習養而成也尤難得大抵人之材質不甚相遠惟習與
養耳習養則達習養之久則成夫習養於數十年之久
而廢之於一旦誠為可惜此古人所以有人惟求舊之

說也臣於所屬地方得三人焉是皆習之於歷任而養之於累年大可以康濟一時次可以浚明庶政而不可久棄者也原任都察院右副都御史張潤才猷宏遠而譽望素隆持守堅定而涵養已久原任巡撫遼東都察院右副都御史成文秉公持正再蹶而氣不衰氣碩才優一誠而人皆與原任通政使司右通政党承志獨立不阿而無攀附之私斂華自韜而有在中之美臣又訪得各官家食以來杜門讀書不事干謁造詣益深習養

益進鄉評攸重士論咸惜焉如蒙勅下該部再加訪察
如果臣言不妄將張潤等特賜起用則人材不至於輕
棄而於治道不無少補矣緣係薦舉地方賢才事理未
敢擅便為此具本專差親齎謹題請旨嘉靖十五年十
一月二十五日

北敵大舉深入官軍奮勇追殺斬獲隊長徒衆首
級奪獲戰馬軍器等事

謹題為北敵大舉深入官軍奮勇追殺斬獲隊長徒衆

首級奪獲戰馬軍器等事據守備偏頭關指揮使楊璲
呈嘉靖十五年十月十四日戌時據平寇城傳事夜不
收走報本日卯時大舉敵人約有二萬餘騎進入大邊
磨兒山往南行走後有灰塵不斷十六日丑時據原差
夜不收走報哨至平寇衛哨得前敵十四日至地名團
城子下營離平寇城十里十五日起營由担子山往南
去訖等因得此即時馳報蒙巡撫山西右副都御史韓
某會同鎮守山西副總兵傅鐸調統遊擊將軍祝雄營

有馬遊兵官軍二千餘員名并本職偏關有馬官軍一
千二百餘員名十六日申時至八角堡哨得前敵十六
日辰時分從朔州前後寨起營由溫嶺灰泉梁等處越
過本鎮疆界本日申時至寧武關地方義井坪下營復
蒙副總兵傅鐸料得北敵衆舉深入必侵鎮西岢嵐等
處為害差人掣調寧武關守備蔡希倫帶領有馬官軍
一千餘員名八角守備萬山帶領有馬官軍四百餘員
名合營起行間十七日午時哨得前敵由羊房紫塞入

山越過支鍋石隘口徑往寧武關地方三馬營等處去
訖蒙副總兵傅鐸發號統領本職并遊擊祝雄等各家
兵馬本日酉時由八角起行至十八日黎明到於寧武
關當蒙副總兵傅鐸與遊擊祝雄分哨兩路並進本日
未時至地名分水嶺迎據夜不收走報哨見大舉敵人
在於地名三馬營等處下營分遣敵人四散搶掠得此
蒙副總兵傅鐸申嚴號令會合遊擊祝雄身先士卒督
率官軍急進本日申時至三馬營地方其衆遙見人馬

披戴盔甲擺列營陣衝突前來蒙副總兵傅鐸督令本
職等鼓舞官軍各用鎗砲弓箭骨朵奮勇爭先射打內
一人身長六尺披戴明盔堅甲即若鐵人當先指示衆
兵與官軍交戰良久當被本職部下小旗薛資才撲入敵
陣將隊長砍重落馬餘敵棄營潰散我軍乘勝追殺就
陣斬獲首級掣奪旗號戰馬軍器等件及將敵人營巢
踴奪彼欲窮追天晚恐墮敵計收兵就彼下營將其行
道路堵截十九日黎明其衆披戴盔甲張打旗號復來

衝突塵土蔽天矢注如雨蒙副總兵傅鐸督率本職等
當先迎敵衝戰數十餘陣敵見兵馬強勁內一人勒馬
答話我是大同人你是那裏人馬令通事回答是偏關
并老營堡人馬其人說不曾搶了你地方你將我大頭
兒父子都殺了又殺了我許多兵卒衆人號泣討路放
過去罷我軍布置營壘周密無隙可逃輒由地名酒務
溝登山沿梁從黃土坡直抵樓子山徑奔黃花嶺遂去
當將收獲被擄牛羊驢畜就彼召主認領訖二十日卯

時據寧武關陽方堡坐月夜不收走報十九日申時復進敵人三萬餘騎到於朔州前後寨直抵陽方二墩紅崖兒止營長三十餘里備報得此蒙副總兵傅鐸揆度此敵動靜接踵前來必有深入之謀故意緩我兵馬東援決定西侵移兵寧化城探敵向往二十一日報到前敵仍由溫嶺過界至義井大小辛莊下營探知五所寨按伏步兵有備二十二日起營分為三股不敢四散擡營徑往西走蒙副總兵傅鐸統領本職等各枝兵馬急

由支鍋石口從鞦韆溝黃花梁到於五所寨二十三日
跟襲敵蹤追逐其衆遙見兵馬灰塵大起本日夜起營
由木奎溝蒿溝梁石豁子等處往北去訖二十四日未
時分馳至地名鄧家山被收後精騎敵人約有一千餘
騎披帶盔甲衝突前來蒙副總兵傅鐸并遊擊祝雄身
先士卒督令官軍齊力射砍連衝數陣敵人敗遁就陣
斬獲首級戰馬軍器等件其衆見得本鎮兵馬連日鏖
戰又見大同遊擊趙綱尹堂領兵繼後聲勢聯絡不斷

往北且行且戰我軍追逐不捨本日酉時其衆由岩頭
寺等處出於三邊外下營家副總兵傅鐸統兵於南溝
梁下營與之對壘其衆本日夜三更時起營由馬頭山
遁出邊外二十五日將其拆邊塚口砌完固收兵於老
營堡二十六日領兵全勝回關為此今將斬獲首級有
功官軍分別衛所職役并奪獲戰馬軍器理合具呈伏
乞施行等因續據鴈門等三關遊擊將軍祝雄手本為
傳報鄰封大敵深入侵越地方官軍奮勇殺敗其衆斬

獲隊首奪獲戰馬軍器等事開據坐營都指揮僉事王
言呈開本營斬獲首級有功官軍分別首從備開衛所
職役并奪獲戰馬軍器等件及重傷旗軍追殺緣由前
來等因節據寧武守備蔡希倫八角守備萬山各呈開
前項月日與大敵交戰各部下斬獲首級戰馬軍器等
件數目到臣據此案照先為傳報鄰境大敵侵越地方
官軍迎敵斬獲首級戰馬軍器事據偏頭寧武八角守
備指揮楊璲蔡希倫萬山各呈開本年九月十七日大

舉敵人由巖頭寺等處進入至二十三日統兵追殺斬獲首級戰馬及奪獲被擄牛羊緣由并遊兵坐營都指揮僉事王言呈開本月十七日至十八日本官領兵與大敵對敵攻戰奪獲戰馬重傷陣亡官軍數目到臣除將前項奪獲被擄牛羊召主認領取領附卷及通行各官從公查勘敵人經過地方搶擄頭畜損折官軍數目有無隱匿仍取各官不致扶隱甘結呈報以憑會議叅究去後及照節該臣遵照兵部題奉欽依隄備事宜又

經會發各關步兵續該臣會帖行鎮守山西副總兵傅鐸將偏關春班官軍仍留預先分布各該關隘營堡按伏備行各關守備等官各將沿邊一帶地方緊要城堡修築城垣隘牆挑挖壕塹坑窖及將所部兵馬嚴加整搦鋒利戰具分布要害地方按伏堵截又該臣會同鎮守山西副總兵傅鐸行令遊擊祝雄所統兵馬合營隨其向往追襲截殺及調發寧武關下班官軍及選操餘丁新置馬軍前去靜樂天門關忻口等要害之處按伏

遇殺中外布置嚴密外今據前因會同鎮守山西副總
兵傅鐸議照敵人糾集各部落羣類屢次大舉侵犯地
方形勢比往甚有不同頃復進逼深入腹裏全無顧忌
臣等仰仗皇上神威遠布及該臣等預先設伏兵馬收
斂人畜堅壁清野烽火嚴明督調遊擊守總等官提孤
兵臨大敵日夜奔馳鏖戰出奇邀擊追殺斬獲隊長并徒
衆首級二十九顆掣奪旗幟四桿戰馬六十九匹軍器
三千四百一十二件支躡奪敵人營寨除將首級送巡

按山西監察御史紀驗馬匹給軍騎操軍器發山西都司貯庫節次敵人出沒地方有無被擄人畜并損折官軍通候查勘明實另行具題外為照殺敵有功官軍臨陣奮勇斬獲首級奪獲戰馬軍器功雖不多然敵風大挫士氣少振再照副總兵傅鐸平昔之謀勇素優臨陣之機宜咸當故能提一旅之孤軍挫數萬之強敵遊擊將軍祝雄先因應援大同主兵皆潰身被數傷而鏖戰不衰今以合兵本鎮畏瘡奮出挺身先鋒而遂致斬獲

伏望皇上軫念邊兵効勞以寡敵衆勅下兵部將有功
官軍照例奏請陞賞傳鐸祝雄量加賞勞以示激勸則
官軍奮勵將來大功可期敵患可彌矣緣係北敵大舉
深入官軍奮勇追殺斬獲隊長徒衆首級奪獲戰馬軍
器等事理臣等未敢擅便為此開坐具本專差親齎謹
題請旨嘉靖十五年十一月二十七日

自効不職乞恩罷黜舉効將官不能遏敵以致殘
傷地方事

謹題為自劾不職乞恩罷黜舉劾將官不能遏敵以致殘傷地方事照得臣提督所屬地方本年八月二十五日敵人深入繁峙縣地方搶掠九月十八日深入鎮西衛五所大寨地方搶掠十月十七日至靜樂縣界又入寧化所等處搶掠十月二十二日又該鎮守山西副總兵傅鐸差夜不收口報大舉敵人不知其數前後聯絡三十餘里又入鎮西衛地方搶掠又准鎮守山西副總兵傅鐸手本開稱遊擊祝雄部下斬首七顆守備楊璠

部下斬首一十五顆守備蔡希倫部下斬首四顆守備
萬山部下斬首三顆共二十九顆臣俱先後具題訖其
各地方失事緣由除繁峙縣地方臣先行分守冀寧道
查報未明駁行復勘五所大寨寧化靜樂鎮西等處臣
行山西按察司僉事查勘至日另行具題外叅照鎮守
山西副總兵傅鐸既受三關之重寄不能却深入之敵
鋒遊擊將軍祝雄偏頭關守備楊璲寧武關守備蔡希
倫八角堡守備萬山代州守備王臣均有提兵之責各

有失事之罪緣各官雖稱衆寡不敵及有斬獲微勞然功罪自不相掩再照臣以一介迂腐之書生叨居提督之重任乏禦侮之長策致地方之殘傷功則出於他人失則由於自致鰥曠之辜宜坐典守之責難辭法所不容罪當萬死伏望皇上憫臣愚昧將臣先行薄賜罷黜將各官仍行巡按御史查勘明白具奏勅下該部酌量功罪另行議處臣不勝待罪恐懼之至緣係自劾不職乞恩罷黜舉劾將官不能遏敵以致殘傷地方事理未

敢擅便為此具本專差親齎謹題請旨嘉靖十五年十
二月初二日

大慶事

謹奏為大慶事仰惟皇上聖德格於皇天乾坤鍾乎秀
氣於本年十月初六日荷帝之休協時之吉皇子篤生
焉惟達孝顯於昌後肆元嗣誕於光前益增九廟之輝
榮大衍萬年之胤祚蒙瀛忻忭臣庶懽騰況臣昔侍經
筵之時曾忝春宮之職下情喜躍萬倍尋常臣謹吉服

望闕叩頭拜疏稱賀緣係大慶事理為此具本專差親齎謹具奏聞嘉靖十五年十二月二十五日

擒斬賊徒地方已寧事

謹題為擒斬賊徒地方已寧事據山西按察司分巡冀南道兼理潞安兵備僉事方日乾呈問得犯人賈得鳳等招由并叅呈到臣卷查嘉靖十五年八月初五日該山西按察司分巡河東道兼理兵備僉事王世隆呈為宗室謀害父叔放火殺人事臣會同前巡按山西監察

御史趙元夫具題前事隨委山西都司都指揮使紀振
統兵前去相機剿捕及行山西守巡冀寧等道嚴督府
衛州縣隄備并陽曲等王府教授查各宗室因何事故
興此逆謀又恐賊勢窮促奔逸鄰省隨即會行陝西河
南北直隸撫按衙門遇有侵犯一體剿捕并明立賞格
曉示催督該道等官追剿間本年八月十六日僉事王
世隆呈稱賊徒張世朝等擒斬地方已安仍該臣會同
巡按山西監察御史趙元夫巡按山西等處監察御史

沈鐸各具本題知及坐委山西按察司整飭石隰兵備
僉事朱旒親詣地方查勘有功失事人員未報本年九
月初三日又准兵部咨職方清吏司案呈奉本部送兵
科抄出臣等題前事奉聖旨該部知道欽此欽遵該本
部看得山西撫按等官都御史韓某等題稱山西陽曲
王府鎮國中尉知斌等因與父叔有讐要行謀害潛養
強盜逮得儒等糾同西河王府奉國將軍表寨并指揮
張世朝等四十餘人進入伊父府內打開軍器房搶出

監甲放火燒毀官民房屋殺傷軍民人等府衛軍兵隨
即追捕已獲知焦及擒獲逮得儒等拘繫監候內有宗
室及指揮張世朝等奪門而出一節為照前事干係宗
室及地方重情除巡按官查勘明白徑自具奏定奪但
內稱各賊奪門而出況平陽地方連年荒歉若勢迫利
誘則人心易搖訪得指揮張世朝極其兇惡無賴不早
捕滅未免貽患地方所據前奏相應議處合候命下之
日本部差人馬上齎文與巡撫都御史會同巡按御史

督同該道守巡等官并都司紀振整率軍兵民快隨賊
向往設法剿捕務在目下盡絕以靖地方慮恐宗室在
內衆賊假借位號官軍畏法不敢擒剿必須先降明旨
處分庶為便益等因覆題奉聖旨是便差人馬上齎文
與撫按等官著整搦兵快隨賊向往設法剿捕務在目
下盡絕以靖地方宗室在內的一體擒拏不許畏避誤
事欽此欽遵又經會行委官僉事朱旒與該道僉事王
世隆查勘間十月二十日據委官僉事朱旒與該道僉

事王世隆各將查過前項事情招叅前來臣恐事情未
悉併行僉事方日乾覆勘間今據前因會同巡按山西
監察御史覆詳明白除首惡宗室知斌知焦指揮張世
朝生前猖亂俱各死斬再難別議外叅照強盜犯人見
在賈得鳳等三十六名俱以狠惡之性陰助亂逆之謀
聚衆殺人肆行無忌焚倉劫庫極其兇殘俱問斬罪照
例梟首但李景堂等雖各監故若不嚴伸乎國法何以
警戒於將來合將各犯斬首與張世朝周名馬亢兒首

級一體梟掛情法相應人心稱快及照充軍犯人劉江等一十四名擅入王府教誘為非設局開場騙財賭博揆於見行條例俱當邊衛充軍看得西河王府奉國將軍表寨叨居宗室罔知祖訓之遵陽曲王府信都鄉君儀賓鄭志海濫厠王賓甘作逆儔之黨且各助成虐欲拒敵乎官兵鼓舞羣兇殺傷乎民快情犯深重人心怨憤但表寨於被執之後揚言投首原非悔悞之本心鄭志海於事敗之餘棄馬奔逃特為苟免之私計宜坐惟

均之典難同末減之條相應叅奏查照重典施行再照
巡按山西監察御史趙元夫警報一聞會發官軍以剿
捕而兼出招安之策巡按山西等處監察御史沈鐸賊
衆猝至督發官快以應援而遂致斬獲之功二臣者風
紀振揚法令清肅分布於關山津渡而把截之甚周傳
報於本省鄰封而防禦之極密以是各賊戰則不能奔
則無地原賊之就擒則二臣之功賞宜從厚者也先任
山西布政司左參政今陞湖廣按察司按察使高叔嗣

親臨戰理反側以安山西都司都指揮使紀振直抵撝
除亂集俱盡平陽府知府李櫝督率官兵以應敵併力
防禦而成功本府通判陳實冒鋒向往而義不辭艱運
司副使張雲鵬發兵應援而勢因振舉臨汾縣知縣趙
統以義倡民市人為之樂戰以身應敵餘賊因之克平
平陽衛指揮僉事崔憲戚銘身當士卒之先斬獲兇魁
之首本衛指揮使王鉞閑住指揮同知孫廷相並奮敵
愾之勇均收野戰之功曲沃縣主簿劉廷瑚安邑縣縣

丞郭守中臨汾縣典史黃誥臨事不避艱危捕賊俱多得獲以上各官勞績可嘉亦當重賞以勸有功者也太原左等衛指揮同知等官劉勝陳彬李承祖陳价頓登竹勲平陽衛指揮同知崔崇引兵赴調而撈捕未盡之奸平陽衛右所正千戶李滄王廷臣副千戶王鈺前所副千戶楊遇先盧桂後所正千戶李賢百戶李俊因事効勤而阻遏方張之勢以上各官亦應量賞以酬有事者也又照巡捕平陽衛指揮同知錢鍾平陽府檢校李

大綸臨汾主簿高桂職膺巡捕事欠防閑既蹈興戎之
變難辭失事之愆陽曲王府教授見任田鳳去任劉沄
登牒不審冒亂宗枝又與西河王府今丁憂教授安審
署印典膳楊杲輔導無方深負職業平陽衛守門鎮撫
丁鸞後所百戶何大寧右所百戶孫富專司啟閉之責
全乏譏察之嚴賊入而不知防賊出而不能拒俱屬有
違律合提問但錢鍾李大綸高桂陣前各有微勞限內
舉見捕獲以功論罪似應准贖又與田鳳等俱犯革前

及劉沅安睿在任犯罪去任事發緣表寨係宗室鄭志
海係儀賓高叔嗣等俱有功官員田鳳等俱王府官錢
鍾等俱軍職均乞聖裁強賊賈得鳳等俱重刑牢固監
候待報施行已斬獲強賊張世朝周名馬亢兒首級并
監故李景堂等俱梟首示衆已解散未獲李良等行令
各該府衛州縣嚴限巡捕官兵緝拏外緣係節奉欽依
是便差人馬上齎文與撫按等官差整擗兵快隨賊向
往設法剿捕務在目下盡絕以靖地方及并擒斬賊徒

地方已寧事理臣等未敢擅便為此具本專差親齎謹
題請旨嘉靖十五年閏十二月二十五日

教職親老懇乞調任以全祿養事

謹題為教職親老懇乞調任以全祿養事據山西平陽
府蒲州猗氏縣儒學申准本學教諭宋剛闕等因備闕
學司擬合就行為此今將孤身遠任不能祿養事干切
己緣由理合申乞裁照轉奏調任施行等因具申到臣
看得所申教諭宋剛闕稱母年八十相離原籍二千餘

里家貧不能顧養乞要調任附近以便養親一節為照
本官家貧親老為祿而仕今親年八十原籍去任所二
千餘里辭祿而歸養則貧無以資就祿以迎養則力不
能致心實可哀情非得已況我國家設官以來司教之
職亦有除授本省者改選附近法亦相應仰惟皇上躬
行大孝以化天下天下臣民歸其有極所謂堯舜帥天
下以仁而民從之者宜乎本官於此不能自己也伏望
皇上憫其孝思之心體其不得已之情勅下該部將本

官改選附近地方如此則不惟本官仰荷皇上曲成之德圖報之誠益加効竭而凡為人子者亦將益興其孝矣緣係教職親老懇乞調任以全祿養事理未敢擅便為此具本專差親齎謹題請旨嘉靖十五年閏十二月二十五日

乞恩迴避事

謹奏為乞恩迴避事照得臣因所屬三關地方大敵深入殺掠人畜見該科部官員查勘臣以一介書生叨居

重任不能運安攘之策以致地方殘傷雖萬死不足以塞責荷蒙聖明不即加斧鉞之誅命官查勘臣雖粉骨碎身不能仰答洪恩於萬一然於法於義臣當迴避蓋臣之所當迴避者有二也一則科部官查勘必須委官必取地方人等結狀臣既在任行事則委官地方人等脫有分毫欠實難免顧忌之疑其咎皆在於臣也一則臣與他邊都御史不同他邊都御史所管止是邊境地方事務臣乃兼管山西腹裏一省三府一十六州七十七

縣以十分為率計之邊事不過十之二而腹裏之事則有十之八臣既被勘則人心玩易法令難行臣雖竭力趨事終難展布雖覲顏就列心實欠安臣恐日久職墮臣之一身名節罪戾不足惜遺患地方所係非輕也伏望皇上軫念邊腹地方容臣迴避不候交代回還原籍聽勘則臣不勝感戴天恩隕越待罪之至緣係乞恩迴避事理為此具本專差親齎謹具奏聞嘉靖十六年正

月初三日

恤災固本事

謹題為恤災固本事案照先該兵部奏奉欽依內事理
行令各處鎮守總兵巡撫內外官員嚴督所屬守備等
官查勘所守地方但有緊關要害城堡墩臺等項坍塌
者量撥官軍修理堅完之日將脩過工程數目開報查
考等因已經通行偏頭寧武代州三關并八角守備指
揮使楊璉等各將所守地方邊牆墩堡關隘但係緊關
要害去處應脩應補等項工程務要脩理堅完回報以

憑會奏去後今據各官呈開嘉靖十五年正月起至本年閏十二月終止各將脩補并創立過各項工程數目到臣會同鎮守山西副總兵傅鐸查勘相同外為此開坐具本專差親齎謹具題知嘉靖十六年二月二十日

公薦舉以備任用事

謹題為公薦舉以備任用事准吏部咨該本部題文選清吏司案呈奉本部送吏科抄出太師兼太子太師武定侯臣郭某奏嘉靖十五年十一月二十五日臣郭某

臣李某臣夏某欽蒙皇上召見於文華殿西室荷蒙聖明品題文武官員每以人才不足任用為嘆臣惟天生一世之才自足一世之用除見任外即今文武大小官員充軍為民冠帶間住及致仕去任者有所犯或情輕律重者有誤犯罪遣者有因考察所司誤聽人言或平生鯁介不能奉承致人左道者原所劾者後雖自覺其非亦無可奈何矣况又有吏部題准嚴例不許奏辯所以考察黜退有才者不得復用虧枉者不敢辯理至於

大禮大獄被黜之人大赦在所不原仰見皇上惡惡之
嚴垂戒之遠但其中有專主者有附和者有佐貳及屬
官不得已而隨從者譴謫日久自新無路情重者固難
輕宥若果出不得已才識可用者亦許從公推舉如蒙
聖明開天地再造之恩將臣所奏前項事情乞勅府部
九卿科道等官及南京各衙門并各處巡撫巡按各舉
所知備開來歷不拘名數或奏聞於上或咨送該部類總
奏請簡用皇上求賢之心庶不負矣等因奏奉聖旨吏

兵二部看了來說欽此欽遵該本部議處合候命下通行兩京府部九卿科道及在外撫按官查照本官奏內事理從實舉奏等因覆題奉聖旨是欽此欽遵備咨到臣除原任都察院右副都御史張潤成文通政司使右通政党承志臣先已舉薦外臣訪得臣所屬地方原任南京兵部尚書劉龍久侍經筵繼膺參贊才猷茂著學行素聞特以用一人之非買一魚之細見論而罷豈非所謂以二卵棄干城之將者哉原任都察院右副都御

史陳璘歷任以來聲名耿耿抱籌邊馭衆之才有謹身務實之行及膺巡撫之任適當難處之時七疏求歸而未能一被人言而遂罷先任南京福建道監察御史今間住江西按察司僉事賈世祥歷官未久失德未聞直以互相糾劾之時遂致吹毛求疵之舉年富才清未可遽棄况三臣者家食以來讀書力田不事干謁鄉評攸重士論咸惜縱有微愆悔悟已深矣伏望皇上俯念人才難得勅下該部再加訪察果如臣言將劉龍等起用

庶人才不至於輕棄而三臣之心迹亦得自明矣緣係
公薦舉以備任用及奉欽依內事理未敢擅便為此具
本專差親齎謹題請旨嘉靖十六年六月初八日

軍情敵中走回男子傳報軍情乞討火器以防侵掠事
謹題為敵中走回男子傳報軍情乞討火器以防侵掠
事據守備寧武關地方以都指揮體統行事指揮同知
雷澤呈稱蒙臣發下偏頭關守備程九疇解到來降敵
人周祿哥子等三名到職依蒙隨拘本關通事段子倉

等番語審得周祿哥子等俱係陝西寧夏鹽池人自幼
搶去在敵牧放馬匹聽得衆敵人們說有小王子因北
敵烏梁海無子小王子要將他兒子與烏梁海做子承
襲他說要合兵一處馬肥草茂時入南朝來搶等因具
由呈報到臣據此卷查先為敵中走回男子事據偏頭
關守備程九疇呈稱嘉靖十六年五月十六日申時據
大邊永安墩坐月夜不收馬士友等伴送敵中走回男
子周祿哥子等到職審得俱係陝西鹽池人於嘉靖元

年正月內被敵人搶去今夏在於河東邀放孳牧大小
母子馬匹見得衆敵人醉了偷趕馬四十五匹乘空得
脫騎趕前來在敵營時聽得彼中每說到馬壯時候來
要報讐搶殺等情前來除會行三關遊擊守備守堡等
官修堡練兵比常十分加謹隄備外會同鎮守山西三
關副總兵右軍都督府都督僉事看得寧武關守備雷
澤呈稱審得周祿哥子等說稱自幼搶去在敵牧放馬
匹聽得衆敵人們說有小王子因北敵烏梁海無子小

王子要將他兒子與烏梁海做子承襲他說要合兵一處馬肥草茂時入南朝來搶報讐一節議照雖係傳聞之言未必可信要之敵中有此深謀故走回人口得以聽知雖彼未必決來然防之不可不預臣聞烏梁海者所謂黃毛敵人是也勇悍倍於北敵世居北敵之北先屬北敵後乃背叛彼此互相讐殺數十年來殆無虛歲每當北敵深入我地則烏梁海必率領精銳襲其巢穴北敵憚之今乃議要連和合兵來搶必有奸人為之謀

畫其為秘計亦異矣古云外國相攻中國之福也果如
人口之言則外國連和豈非中國之憂哉況敵性本自
勁勇又挾報復之忿且欲連和羣類合勢而來是必簡
聚精強以圖深入以快慘殺為邊疆之害不淺矣再照
中國長技火器為上北敵所畏亦火器為最而火器之
中佛郎機銃尤為便利邊關之地所以自衛攻敵者惟
此是恃也伏望皇上軫念邊方勅下該部將見貯佛郎
機銃發送一千付聽臣等分給各城堡以防敵至如此

庶幾有備無患而邊境有賴矣地方幸甚臣等幸甚緣
係敵中走回男子傳報軍情乞討火器以防侵掠事理
臣等未敢擅便為此具本專差親齎謹題請旨嘉靖十
六年六月初八日

苑洛集卷十五

欽定四庫全書

苑洛集卷十六

明 韓邦奇 撰

大舉聲息事

謹題為大舉聲息事嘉靖十六年八月十七日辰時據
鴈門等三關遊擊署都指揮僉事祝雄差夜不收口報
敵人約有三萬餘騎從渾水并青糜子二溝出到八柳
樹地方至林家坪下營二十里長約有三里寬後有灰

塵十里不斷本日申時又該鎮守山西三關副總兵右
軍都督府都督僉事周尚文差夜不收口報八月十四
日平敵衛傳報夜不收報說平敵衛大邊墩石塚山敵
人分作六股頭行約有四萬往南行走十五日周總兵
領人馬要去八角截殺十九日又該大同副總兵郝鏗
差夜不收口報副總兵帶領本部人馬於本月十八日
於大同起行本日又據鴈門兵備副使稟帖報稱據寧
武關守備雷澤差夜不收報稱十六日未時分有敵人

四萬餘騎自八角地方西窪村擡營行至鎮西衛地名
五所大寨往西南不住徐徐行走總兵官周尚文督率
遊擊祝雄守備雷澤等合兵一處隨敵向往跟襲截殺
本月二十日又據大同叅將李彬差夜不收口報李叅
將帶領本部人馬已到與周總兵人馬合營應援等因
節報到臣卷查先於本年六月十一等日節據鴈門兵
備副使節次報為火砲聲息事已經會本具題及嚴行
三關遊守等官嚴加隄備并行文宣大等鎮遇有警報

各查照兵部題奉欽依內事理各帶領本部人馬前來
應援去後今據前因除選委太原左等衛指揮宮勲等
各帶領馬步官軍於寧化等處臨邊要害地方按伏截
殺寧化所宮勲奇嵐州張文愷靜樂縣李承祖嵐縣竹
勲興縣頓登及選委原任守備指揮張文總領五處官
軍相機調度又選委指揮袁漢呂調陽各帶領人馬前
去袁漢天門關呂調陽忻口各按伏截殺并給各官輕
便火器及嚴督三關遊守等官各嚴明號令相機戰守

仍行兵備副使分布軍壯於十八隘口設伏其各地方
官員有無失事及有無斬獲功次候敵退之日另行具
題外緣係大舉聲息事理為此具本專差親齎謹具題
知嘉靖十六年八月二十一日

大舉敵人出邊事

謹題為大舉敵人出邊事嘉靖十六年八月二十四日
據太原左衛中軍指揮同知劉勝稟帖審得周總兵原
差夜不收報說本月二十日敵人在鎮西衛地方三井

下營二十一日三井起營行至狼窩山下營二十二日
狼窩山起營行至鄧家山見陣本日從巖頭寺往西北
行走本月二十五日又據鴈門兵備副使稟帖報稱本
年八月二十三日未時據本道原差夜不收前去八角
等處哨探回還報稱敵人於本月二十日在於鎮西衛
地名三井村開營二十二日仍從舊路北去人馬追趕
等情本日又據中軍指揮同知劉勝稟帖報稱本月二
十五日祝遊擊差總旗朱友貴報稱本月二十二日敵

人從巖頭寺青糜子溝鴿子窩東山馬頭山等墩紅門
迤東出口去訖等因節報到臣卷查先為大舉聲息事
節據鴈門等三關遊擊署都指揮僉事祝雄等差夜不
收報稱有四萬餘騎擡營行至鎮西衛等處地方臣選
委太原左等衛指揮宮勲等各帶領馬步官軍於寧化
等處臨邊要害地方按伏截殺及嚴行三關遊守等官
各嚴明號令相機戰守仍行兵備副使分布軍壯於十
八隘口設伏備由於本年八月二十一日具題訖今據

前因除地方有無搶戰人畜及各官有無斬獲功次候查明另行具題外為照敵人大舉深入臣已先行具本題知今敵人既已出境若待查明具奏臣恐上厯皇上西顧之憂緣係大舉敵人出邊事理為此具本專差親齎謹具題知嘉靖十六年八月二十五日

大勢敵人擁衆深入急調隣兵會合迎敵官軍奮勇斬獲首級奪獲戰馬軍器人口等事

謹題為大勢敵人擁衆深入急調隣兵會合迎敵官軍

奮勇斬獲首級奪獲戰馬軍器人口等事據守備偏頭
關署都指揮僉事程九疇等各呈前事備報到臣會同
鎮守山西副總兵周某議得敵人陰蓄機謀糾集套衆
吉囊等部落慣戰羣類侵越三關犯我晉省投來人言
意搶綾段人畜久不露形偶爾舉衆陽從大同邊界墳
嶺等處倉卒入我境界暗由夾道西來意在攻我無備
幸得差哨早報信砲分傳臣等差人分投省諭隄備敵
從偏關平涼泉等墩進邊烽火通明柴堆并焚四野早

知人畜趨避無虞前敵深入臣等查照總督軍務都察院右都御史兼兵部左侍郎周某節行咨文及兵部題奉明旨但遇緊急徵調隣兵互相應援事宜分投差人即調隣兵繼後協力日夜逐追據報前敵散去搶掠岢嵐等處止留一半守營將士乘彼分勢奮不顧身向前齊力用命射斫三日鏖戰五次仰仗皇上神威聖武傷死敵人甚多但交鋒之際不及斬首多被鈎駝去訖鋒前斬獲首級奪獲戰馬軍器等件功雖不多士氣少振

敵人深入由貳邊至於老營堡八角三岔五所大寨一路往還五百六七十里兵衆相挾俱未得搶追逼計窮擡營前到鎮西岢嵐劫搶人畜止是半日因兵後擊前敵各山旋馬當日掣回擡營遁去搶掠人數因兵追戰太半丟棄自回鄉土緣敵營部落數多別糾來侵事計難測除行各關守備遊擊各整兵馬仍行沿邊各路墩臺守瞭人員比常十分加謹隄備及申明催督前項敵經衛所州縣各令鄉屯急添堡寨各編堡頭設置柴堆

輪撥夫守遇砲傳燒柴堆人畜早知收堡堅壁四野外
查得沿邊州縣衛所惟靖樂興縣申報前敵未到地方
其各衆經行鎮西岢嵐寧化嵐縣行令雁門兵備副使
行查未報欲候查到慮恐遲悞除將斬獲隊首奪獲戰
馬軍器開送巡按山西監察御史紀驗明實及各敵經
地方有無搶掠人畜另行具奏外臣等先將敵來日期
并官舍旗軍通事人等衝鋒殺敵奮勇當先三日鏖戰
五次殺傷前敵鋒前斬獲首級奪獲戰馬軍器等項有

功官軍緣由具奏伏望皇上軫念邊兵以寡敵衆苦中
得生乞勅下部仍行查勘明白照例奏請陞賞以勵人
心以激將來再照當鏖戰之時彼衆我寡敵人旋繞綴
擊我軍不解甲者五日不飲食者三日人心危懼幸得
副總兵周尚文隨機應變申近來未行之軍法斬退縮
違令之軍人揭竿懸首然後衆心始堅殊死効力敵衆
望見懸首以口咬指是以我軍得以保全敵人終於退
遁緣係大勢敵人擁衆深入急調隣兵會合迎敵官軍

奮勇斬獲首級奪獲戰馬軍器人口等事理臣等未敢擅便為此具本專差親齎謹題請旨嘉靖十六年九月初六日

欽遵勅諭因時察勢益兵據險以防敵患以衛中華事

謹題為欽遵勅諭因時察勢益兵據險以防敵患以衛中華事嘉靖十六年五月二十七日欽奉勅巡撫山西都御史韓某副總兵都指揮僉事傅鐸近該監察御史

徐九臯奏稱各邊武備廢弛請命大臣行邊逐一經畧
修舉等因朕以爾等久膺邊方重寄特茲勅諭爾等親
歷各處嚴督所屬逐一點視何處軍馬缺乏所當選補
何處兵甲損壞所當修葺牆垣壕塹有無高深墩臺城
堡有無完固器械有無齊備糧草有無充足或修或補
督令有司着實用土或增或益不許虛應故事其軍職
官員如有貪懦無為役占軍士以致操守不嚴備禦無
法者爾等叅奏拏問凡利有可興弊有可革者聽爾便

宜處置應奏請者具實奏聞爾等須悉心整理務使邊
備修舉地方寧謐庶副委任如或照前因循廢弛以致
臨期誤事責有所歸年終通將整理修舉過事蹟造冊
奏繳以憑查考爾等勉之慎之故勅欽此欽遵臣遵奉
勅諭除選軍行鴈門兵備副使呂昨見今召選馬匹行
令山西都司都指揮鄔祐兵備副使呂昨行太僕寺卿
郭五常陸續買補馬二千七百餘匹兵甲并器械臣會
同鎮守山西副總兵右軍都督府都督僉事周尚文動

支官銀修葺過三關八角等處軍士什物盔甲弓箭旗
鼓響器等項器械完備墻垣壕塹臣行令兵備副使呂
柞將坍塌邊墻壕塹賺馬品字坑窖井通人小路逐一
包砌補修剷削截斷挑挖各深濶陡峻墩臺城堡臣會
同鎮守山西副總兵右軍都督府都督僉事周尚文將
沿邊一帶添築墩臺一十八座堡寨五十一處崖窖百
十餘座臣又以老營堡舊城狹薄不堪容衆固守軍皆
分番終非土著臣謹以召募新軍一千餘名常備將輪

班官軍改回本處防守臣親歷本堡督同先任兵備副使賈啓沿山履野逐一驗看經畫於堡東展築城垣一座週圍三面共長三百六十八丈六尺底濶二丈八尺收頂一丈八尺高二丈塚口小牆高六尺敵臺三座上蓋舖舍各一間堡內起蓋營房一千五百間編立千文字號分給新軍居住官廳一所大小房二十五間石砌水口一處磚券東南門二座幫修過舊城北面連敵臺三座東西共長一百五十八丈九尺西南二面并東北

角一處共長二百八十八丈九尺各底濶一丈收頂六尺高二丈塼口小牆高五尺裏面攔馬小牆高二尺七寸俱已完固糧草臣行令管糧主事許登瀛見今督催糴買其軍職官員貪懦無為役占軍士以致操守不嚴備禦無法者查訪明白之日另行指實叅奏照得山西三關一帶沿邊地方寧武以東隘口及山岡平漫之處雖敵騎可通然有隘可據若得人以守敵終不能長驅而入寧武以西與敵切近為隣則漫然平曠敵騎可以

長驅無阻而原設兵將比之他邊甚少城堡亦甚稀疏然前此敵人顧少侵襲者何也以大同重兵為之屏蔽也且由老營堡至八角所等處土曠人稀無所擄掠必深入至鎮西衛地方人畜堡寨始繁縱有所得及其返也又有大同平朔等處之兵截於前老營偏頭等處之兵乘其後往返必須數日則大同鎮城重兵亦皆會集據險邀擊往往失利而去彼雖意欲奪險然亦有所畏憚不敢輕入故三關之地兵雖寡弱老營堡等處雖極

臨邊境地方平曠而敵之侵襲比之他邊為少也臣等
又查得山西汾州潞州平陽等衛所官軍撥去大同防
禦者七千餘名官軍月糧仍在山西支給夫以山西官
軍戍守大同山西糧儲供給大同者正以其屏蔽山西
也且敵之侵襲三關必由大同邊境而入今者大同之
境時被侵襲切於自顧勢難他及而世平時久事失其
初大同三關又各自分彼此如此則三關之地已為大
邊極塞而老營堡一路平曠若此兵馬之寡弱若此將

官城堡之稀少若此敵騎擁衆南下其何能支哉兵法
曰勿恃其不來恃吾有以待之今待之者無其具也惟
恃其不來耳此在我者如此也臣等載觀近日敵之入
來深謀秘計與昔不同向也無甲冑今則明盔明甲勢
甚剽疾矣向也短於下馬不敢攻它城堡今則整備鉞
鏑攻它城堡矣向也不知我之虛實夷險雖或深入不
敢久留今則從容久掠按轡而歸矣向也羣聚而入羣
聚而出忽若飄風今則大舉決於一處分掠各邊使不

暇應援矣向也兵無紀律烏合而來星散而去今則部
伍嚴整旗幟號令分明矣向也不焚廬舍今則放火焚
燒矣其故何哉有中國之人為之謀畫有中國之人為
之鄉導有中國之人為之姦細有中國之人遺易之以
鐵器況事變之時投入敵中者又皆慣戰有勇之人也
此在敵者如此也度我度彼勝負從可知矣臣等聞之
萌芽不剪滋蔓必長履霜不戒堅冰斯至今大同之兵
既不能為三關屏蔽也而三關之兵馬不增將官不選

城堡不加規畫臣等惟恐今年深入明年深入今年得利而回明年得利而回漸不可長大起於細邊人塗炭不足言也數年之後敵且生心矣臣等竊見各處大邊如宣府延綏等處敵皆不得肆然而入何也一則兵力強盛一則關山險隘一則百戰之餘豪傑彙生皆未有如老營堡之空虛為可乘者也敵若狃於常勝妄興異謀圖入中國惟此途為甚便臣等嘗詳察晉地之界自大河以東由石隰岢嵐靜樂寧武至鴈門歷紫荊居庸

直抵山海關一帶界山崇岡峻坂固天所以限封疆而保障生民者也中古以來類皆守於險外以為重險之固紫荆居庸之外則有宣府一鎮鎮城既設重兵復設五路叅將大小城堡各設守備操守把總等官原額旗軍一十二萬雁門之外則有大同一鎮鎮城既有重兵復設三路叅將九州縣大小城堡各設守備等官原額旗軍八萬餘名其城之堅必不可攻也其池之深必不可越也馭邊設險之道誠莫有加焉寧武以西其險則

在興嵐石隰等處古人皆以此地建節國家亦守於險外置偏頭老營諸城堡然止設一副總兵一遊擊并近日巡撫奏設止有四守備騎兵惟九十餘名而興嵐等處則又棄而不守其城數日之間可攻而破也其池頃刻之際可負土而平也且宣大既有巨鎮重兵而內猶守居庸紫荆鴈門之險今偏頭等處既已兵孤將寡而興嵐等處乃又棄而不守敵騎長驅而下更何所恃以為藩屏哉我國家設險馭邊自遼東以至甘肅經理周密

獨偏頭等處乃一大空缺故臣等以為敵若妄興他志
圖入中國必由此地而入也夫善動者因其時先機者
通其變當今之時變而宜通之時也以臣計之岢嵐州
實彼此之界有險可據宜設一叅將益兵三千神池堡
要害之地宜拓一城設一守備益兵五百八角之東寧
武之西八角之西偏頭之東適中之地亦各為一堡各
設一守備或於五寨前後設立據險以便截殺亦各益
兵五百所益之兵聽臣等召募或於民壯中戶大者僉

取副總兵宜陞為總兵推選謀勇都督領之駐劄寧武其偏關仍一守備益兵八百可也提督都御史不必兼理巡撫山西一省止巡撫沿邊一帶地方忻代保嵐石五州所屬及雁門石隰二兵備并都司布政司管糧官按察司管屯官并守巡冀寧道及參遊守備俱聽節制其餘山西布按二司府州縣官員賢否軍民詞訟歲辦差役俱不必管理庶得專意經略邊事老營堡宜設一所以管常備新軍夫不一勞者不久逸不暫費者不永

寧是不過給馬七千匹發銀十萬兩工程可計日而定也其山西汾州等衛所防禦大同官軍仍掣回山西三關防守遇有緊急與大同互相應援如此則不惟三關之兵威可振而大同之勢亦遂為之壯矣如蒙勅下該部再加議處仍行總督宣大偏關等處地方軍務都察院右都御史兼兵部左侍郎周某博訪羣議覆題如果臣之所言少切時務伏惟聖明俯賜采擇焉臣等不勝隕越待罪之至緣係欽遵勅諭因時察勢益兵據險以

防敵患以衛中華事理臣等未敢擅便為此具本專差親齎謹題請旨嘉靖十六年九月十二日

慎重邊疆以保安地方事

謹題為慎重邊疆以保安地方事據山西布政司等衙門右參政等官趙錦會呈蒙巡撫山西右副都御史韓某批據本司等衙門左布政使等官衛道等會呈據各經歷司呈抄蒙巡按山西監察御史案驗奉都察院巡按山西九千六百五十九號勘合准兵部咨該太師兼

太子太師武定侯郭勛奏陳前事計開一款山西三關地方廣闊先年因在腹裏經畧未備近年官軍十分數少鎮堡倉場糧草在在空虛遇有警報束手無策任其搶掠若不思患預防抑恐將來為害匪細乞勅兵部會同戶部不必專按舊日繩墨虛應故事必須著實舉行如某關可以添兵馬若干在某衛食糧某處可以添糧料草束若干可穀主客兵馬幾時之用務要計出萬全永保無虞方免將來之患矣等因具題該本部議擬覆

題奉欽依准議欽此欽遵移咨備劄轉行三司會同議處回報施行抄呈各司會議間續抄蒙巡撫山西右副都御史韓某案驗准兵部咨前事案行各司即行掌印官會同雁門兵備道從長議處要見某關衝要該多添人馬若干某關偏僻該量添人馬若干編入行伍應與某衛食糧務要計慮周詳會議停當具由呈來以憑會奏施行蒙此依蒙該布政司左布政使衛道會同按察司按察使丁汝夔都司署都指揮僉事鄭東雁門等關

兵備副使呂柝議照山西地方大同三關一帶皆畿輔
藩籬防敵重地大同逼近北敵故當時經略亦備城堡
聯絡軍馬浩大敵雖有勇可保無虞三關稍近腹裏以
大同為之屏蔽故當時經略未詳職等查得雁門關之
東自大安口迤西至本關及寧武偏頭關向南至河曲
縣等處地方延袤一千三百餘里代州守備所統官軍
不過一千七百餘員名有馬者不過五百餘員名寧武
關及神池土棚陽方口王也兒梁等處及西八隘口乃

敵人出沒要路守備所統官軍不過二千餘員名有馬者不過一千餘員名至於偏頭關儘在西北尤為孤懸夏秋之間尚隔一河水結之後彼此同地總兵守備兩營所統官軍不過二千三百餘員名有馬者亦止二千餘員名老營堡雖設有遊擊一員統領官軍三千餘員名此外雖有守城步卒中半老弱不堪調用夫以不滿萬之兵守千餘里之地而當數十萬之強敵實是衆寡不敵近年以來敵志張甚知我虛實每扣三關深入腹

裹萬騎星馳飄忽如風雨東奔則忻代受毒西下則興
嵐被擾况各衛軍旗逃亡數多營伍空虛兵力寡弱沿
邊備禦十分疎略而敵勢日強誠可為之寒心也今照
偏頭關去雁門甚遠寧武關居三關之中為今之計合
無將副總兵官移鎮寧武適中之地令其往來調度隨
機戰守地方有警易於策應偏頭關改設參將一員益
兵三千於岢嵐州添設守備一員益兵五百神池堡拓
築一城設守備一員益兵五百八角堡之東寧武關之

西八角堡之西偏頭關之東適中之地亦各築一堡各設守備一員或於五寨前後設立據險以便截殺亦各益兵五百俱與三關遊守相為犄角彼此應援其所益之兵或召募土著強勇或僉於民壯中大戶盛甲弓箭取於本省所屬衛所歲造馬匹請給太僕寺寄養馬七千匹或馬價銀二三萬兩於本處收買撥付騎征各營應用把總管隊等官於各衛所指揮千百戶內熟於邊務者選擇推用召僉新軍近寧武如神池八角之東者

附隸寧武所八角之西者附隸偏頭所各收籍食糧終身開除子孫願繼者聽仍照近日兵部題准召募土軍事例每軍各賞銀三兩以資置辦軍裝什物庶乎人心樂從又查得大同備禦山西平陽汾潞等衛所官軍七千餘員名原非舊規向以正統土木之變暫留戍守遂成定例每年輪班遠戍異鎮月糧猶在山西支給且訪各軍到彼不過買閑私門徒充廝役而已方今敵人勢大住邊未退且聞敵中走回人口往往傳說不久集衆

大舉深入搶掠謫詐之言固難盡信防禦之策不可不嚴合無將前備禦大同官軍七十員名掣回撥派三關仍照舊規分為春秋兩班更番戍守如有不足召募新軍以充其數掣回官軍除在衛應有月糧外在邊仍每軍日支行糧一升五合新募軍人止給月米如徵調遠出亦各照例支給行糧芻糧如有不足行布政司照數派徵支用再照將者三軍司命地方安危繫焉三關地方止設副總兵一員每於都指揮內推用責重任輕無

以鎮壓人心懾服外敵似宜改陞總兵官職銜推選謀
勇都督充之如此則軍威壯而邊防增重將勢強而地
方改觀三關一帶可以永保無虞借或大同有警亦可
尅期調用矣呈乞照詳蒙批議處固已詳的但事體重
大及原額歲支歲入錢糧總數及應增之數尚未入議
將官之宜參宜守兵馬之宜減宜增城堡之宜廣宜狹
仰再會議回報繳蒙此案照先為前事已經會議呈奪
去後今蒙前因該布政司署印右參政趙錦會同按察

司署印副使章僑都司署都指揮僉事茂鎮雁門等關
兵備副使呂昨覆議得除原議掣取大同備禦平陽等
衛官軍改戍三關事體利便無容別議外今照偏頭關
副總兵改設總兵官推選謀勇都督充之移住寧武道
里適中揆以時勢似為相應但本官原係副總兵所治
仍須添設參將一員益兵三千名馬二千匹及查得苛
嵐州乃古來秦漢中外之界尤戎馬出沒之衝長城基
址猶存又查神池堡接壤溫嶺為平敵之衝亦敵馬侵

凌要害重地先議於岢嵐州及神池等堡各添設守備一員益兵五百抑恐兵微將寡終不能以防遏敵患職等愚計合無於岢嵐州添設參將一員增置官軍三千員名馬二千五百匹神池相地拓築一城設守備一員益兵八百員名馬五百匹八角所之東寧武關之西偏頭關之東適中之地各立一堡各設守備一員或於五寨前後設立據險以便截殺亦各益兵八百員名馬各五百匹庶幾外實而內亦不虛新募軍人仍照近日兵

部題准募軍事例各賞銀三兩募軍附隸鎮西衛并偏寧二所收籍食糧通計所益召募土兵以八千四百名為率每名月支米一石每歲共計該糧一十萬八百石掣回平陽等衛官軍仍舊分為春秋兩班更番戍守每班以三千員名為率兩班六千員每名員名月支行糧四斗五升每歲共計該糧三萬二千四百石二項共該糧一十三萬三千二百石每石折支銀六錢共該銀七萬九千九百二十兩馬六千匹為率每匹月支草三十

束料九斗每歲止支六箇月計草一百八萬束每束折
支銀一分五釐共該銀一萬六千二百兩料三萬二千
四百石每石折支銀五錢共計該銀一萬六千二百兩
通前共計該銀一十一萬二千三百二十兩查得布政
司會計內坐派三關夏秋稅糧馬草起存本折全拋共
徵銀三十三萬八千五十二兩有零屯田子粒大約徵
銀一萬二千餘兩三關實在兵馬大約每歲支用銀二
十八九萬兩計數雖若有餘然中間遇災蠲免拖欠等

項勢亦難免每年合於河東淮浙等鹽內請發八九萬兩庶足前項增益兵馬支用其修建城池公館工料及召募新軍給賞該部量發銀數萬兩應用如此則兵食足而邊防有備守禦嚴而敵患潛消矣惟復別有定奪為此今將前項緣由理合會呈伏乞照詳施行等因會呈到臣會同巡按山西監察御史看得布政等司署印右參政等官趙錦等會議呈稱掣取大同備禦平陽等衛官軍改戍三關副總兵改設總兵官推選謀勇都督

充之移住寧武本關添設參將一員益兵三千名馬二千匹及稱奇嵐州宜添設參將一員增置官軍三千員名馬二千五百匹神池堡拓築一城設守備一員益兵八百員名馬五百匹八角之東寧武之西八角之西偏頭之東適中之地各立一堡各設守備一員或於五寨前後設立據險以便截殺亦各益兵八百員名馬各五百匹召募新軍各賞銀三兩募軍附隸鎮西衛并偏寧二所收籍食糧通計所議召募土軍掣回平陽等衛官

軍吏番戍守增馬六千匹糧草共該折支銀一十一萬二千三百二十兩又稱查得布政司會計坐派三關夏秋糧草每歲徵銀三十三萬八千五百一十二兩有零屯田子粒大約徵銀一萬二千餘兩三關實在兵馬大約每歲支用銀二十八萬九千兩計數雖若有餘然中間遇災蠲免拖欠等項勢亦難免每年合於淮浙河東等鹽內請發八九萬兩庶足前項增益兵馬之用其修建城池公館工料及召募新軍給賞該部量發銀數萬兩應用一

節臣等議照事無定體惟變是趨治有先機因時而動
山西三關比之他邊原額軍馬寡弱錢糧數少近來敵
人形勢異常氣勢日甚習知中國險易虛實往往糾合
羣衆大舉深入舍隘就易避實擊虛將來為患殆不可
測所據添設將官增益軍馬建拓城堡處置錢糧相機
防禦乘時經略正在今日此太師兼太子太師武定侯
郭勛所以有前項論列而參政等官趙錦等所以因有
此議呈也如蒙勅下該部再加查議如果臣等所言少

裨邊務伏望皇上俯賜采擇施行則邊方幸甚臣等幸甚緣係慎重邊疆以保安地方事理臣等未敢擅便為此具本專差親齎謹題請旨嘉靖十六年十二月二十八日

舉薦文學官員以備擢用事

謹題為舉薦文學官員以備擢用事臣惟天下之治係教化而教化之原在賢才今之提學實主教之官也苟得其人則賢才成而教化立治豈有不成者乎臣訪得

山西等處提刑按察司僉事趙廷松操履嚴肅氣節著聞既有立教之本詩文典雅舉業精純又有立教之具誠一時難得之才也如蒙勅下該部再加訪察果如臣言將本官遇有提學員缺推補則庶乎教化可裨而人才有造矣緣係舉薦文學官員以備擢用事理未敢擅便為此具本專差親齋謹題請旨嘉靖十七年正月日舉賢才以裨治道事

謹題為舉賢才以裨治道事臣惟我國家以科目取士天下賢

才盡在網羅之中登其選者莫非俊乂之士高下相去實為不遠惟在習與不習耳夫人才固為難得而造就尤為難成習之於累年而棄之於一旦誠為可惜臣謹以所屬地方聲名著聞年力未衰者四人各因所長具實上陳臣訪得原任兵部左侍郎兼都察院右副都御史劉源清忠義之性實本於天成經略之才有驗于施設退閒已久增益良深此其文武皆通堪任提兵之官者也原任國子監祭酒王道識遠而志高心純而學正

式觀造詣無負斯文原任河南按察司副使王崇慶簡
冊日隨文章為侶甘窮約以終身樂恬退而無悶此二
臣者清修篤志堪任文學之官者也原任山西布政司
使右參政胡松深遠之見明敏之才修職無負於言退
身益勵其志此則浚明亮采之器隨事而能效者也伏
望聖明俯念人才之難勅下吏部再加訪察如果臣言
不妄將各官隨才起用其於治道不無少補矣緣係舉
賢才以裨治道事理為此具本專差親齎謹題請旨嘉

靖二十四年三月日

遵勅諭專職務舉薦所屬賢能官員事

謹題為遵勅諭專職務舉薦所屬賢能官員事臣奉命
總理河道所屬直隸南直隸山東河南地方甚為廣濶
中間賢能官員甚多然臣所奉勅書止是掌印管河兵
備官員其他佐貳官員雖有賢能臣固不敢濫舉其雖
係掌印官而於河道無干者臣亦不敢濫舉其雖於河
道著有賢勞然任淺如整飭曹州等處兵備兼管河道

山東等處提刑按察司副使王傳整飭沂州等處兵備
山東等處提刑按察司僉事徐鶴齡濟寧州知州張崇
德陞任管河兼管水利河南等處提刑按察司副使吳
惺臣亦不敢並舉外臣訪得山東等處承宣布政司使
左布政使葉照施設詳明器識宏遠慎端嚴之操足表
率乎一方抱經畧之才克撫馭乎大鎮整飭大名等處
兵備兼管河道河南等處提刑按察司副使喬瑞明達
之才端廉之操督兵而武事修舉兼訟獄之公平管河

而水道疏通更吏民之畏服直隸大名府知府張謙寬
嚴得體端潔自持約戒精詳諸邑較若畫一差徭酌審
歲省幾至萬金山東東昌府知府歐思誠通敏之才練
達之器勤恤民隱而澤及於困窮剷剔弊端而事振於
廢墮兗州府知府曹亨操持廉謹才器老成善撫來乎
流移而人多稱頌克釐正乎積弊而政報循良直隸河
間府管河通判牛恒溫雅之質明敏之才官謫而志不
墮政舉而人不擾大名府管河通判張文明勤於管河

明於斷獄孝友著聞於鄉國操守無玷於官箴直隸大明府長垣縣知縣郝良臣官久而守益堅宦成而事愈振開舊河以通水利節浮費以省民財以上各官皆其克修職務有裨河道者也乞勅吏部再加訪察果如臣言將各官量其資才擢用則賢能者進而人知所勸矣緣係遵勅諭專職務舉薦所屬賢能官員事理未敢擅便為此具本專差親齎謹題請旨嘉靖二十四年三月日

謝恩事

刑部右侍郎臣韓邦奇謹奏為謝恩事本月初七日臣以衰病不能供職具本乞恩休致十五日准吏部咨內閣奉聖旨韓邦奇不准辭吏部知道欽此欽遵備咨到臣感戴聖明洪恩天高地厚罔極難名謹伏枕流涕叩頭奏謝為此具本專差親齎謹具奏聞嘉靖二十四年十月十七日

陳愚慮以奠江防以固重地事

參贊機務南京兵部尚書臣韓邦奇謹題為陳愚慮以
奠江防以固重地事職方清吏司案呈奉本部送准兵
部咨該本部題職方清吏司案呈奉本部送吏科抄出
南京戶科給事中李萬實奏前事內稱南京城外新江
浦子二口並據南北之衝犄角相資長城天塹王公設
險此其要圖然新江近在附郭向屬操江浦子遠隔一
江全無統攝雖屢經先任都御史簡霄及南京兵科給
事中萬虞愷奏行南京兵部等衙門覆議當時堂屬等

官各懷胸臆之見不推體國之誠謂五衛久屬本部一
旦分轄操巡顧體面則嫌於損威惜成規則嫌於作俑
止錄常行奏覆遂至沮格不行不知事當興革則遇變
而通苟利國家則同心共濟但去藩籬爾汝之私自無
彼此異同之碍查得浦子口應天等五衛并作一營原
額逃亡十去其六其指揮千百戶等官坐擁重資荒淫
驕蹇軍之富者安享於家貧者商販於外每遇守備操
練臨時顧覓應名兵部點操有官期年僅一再至將皆

紈袴卒盡浮游目不辨旌旗之位耳不嫻金鼓之音折
箭敗戈韜囊倚壁習懶成癖安所用之甚者禦貨乘機
坐窩為盜根連窮詰掩覆多方皆因統馭無人以致驕
玩太甚況二口事體既分臨轄各異譬之秦越原不同
心設有緩急憂虞安肯互相應援是平時在浦子既坐
享其安而有警則新江獨受其敵若得備查簡霄萬虞
愷原奏著實議處將浦口五衛仍屬兵部衙門但江防
事宜兼聽操巡約束閑暇則照舊營操以備不虞有事

則調遣策應以為聲援其應否量撥操船悉聽該部酌處應輔車相倚而勢不孤號令一新而兵自足況職方原屬不改其舊部院節制無害其同似亦事之可行者也等因奏奉聖旨該部知道欽此欽遵抄出送司卷查先為再陳愚見以裨江防等事該操江都御史簡霄南京兵科等科給事中萬虞愷等題本部覆奉欽依行准南京兵部等衙門會議得浦子口五衛本為拱護京城與南京各營事體相同自來不係操江管轄是以器無

戰船軍非水卒會典亦無開載遵行年久且無江操器具而徒屬操江管轄恐於事體無益等因照舊不必更改今該前因通查案呈到部看得南京戶科給事中李萬貫奏稱新江浦子二口並據南北之衝然新江口向屬操江而浦子口全無統攝以致官軍驕玩緩急不肯應援要照簡霄萬虞愷原奏將浦子口五衛仍屬兵部江防事宜兼聽操巡約束調遣為照江洋一帶南有新江北有浦子二口邊臨大江水陸咽喉極其要害新江

口屬之操江有戰船水軍以防江寇浦子口屬之兵部
聽守備操練以禦陸衝設備之策無不盡善但二口瀕
江俱當衝要江面廣濶鹽盜為多先年雖有小警隨即
撲滅無足為患近年盜賊出沒無時屢肆猖獗官軍不
能追勦往往失事以故嘉靖十八年操江都御史簡霄
具奏於先二十三年兵科給事中萬虞愷復奏於後俱
各酌量地方身親目擊要將浦口五衛亦屬操江管轄
操習水戰以備應援深為有見但先年查議拘定成規

惜割分轄事成掣肘不便施行以致本官復有此奏要將五衛仍屬兵部江防事宜兼聽操巡約束既不失舊屬之成規又不失部院之節制甚於江防有益事體相宜但事干南京守備參贊等衙門未經覆議遽難准允合候命下仍咨南京兵部會同都察院及科道各掌印官將所奏浦子口五衛仍屬兵部衙門江防事宜兼聽操巡約束閑暇照舊營操以備不虞有事調遣策應以為聲援及應否量撥操船演習水戰等項逐一虛心會

議務使弭盜安民江防可障作速具奏以憑覆議上請
定奪施行如此則通變得宜而江防有備矣等因題奉
欽依移咨到部送司通行欽遵查照外卷查嘉靖十二
年巡江御史宋宜題為陳愚見以安地方事內稱浦子
口與龍江關對峙南至江浦縣北至六合縣江浦則屬
乎上江六合則屬乎下江而浦口獨處其中兩無所屬
雖築有城堡設有守禦及應天等衛所然守禦官臣不
得而督責巡捕官臣不得而委用合無行令守禦等官

聽臣委用等因該兵部議擬移咨南京兵部會同操江都御史查勘浦子口地方巡捕守禦官員從長議處應否聽巡江御史督責委用中間有無違碍議處明白具奏施行該本部尚書劉龍等會議得浦子口號為京營本為拱護南京而設然器無戰船軍非水卒不與操江之事者正以雄據江岸備江北鳳陽一路之警以遏其過江設立以來止聽南京內外守備參贊衙門節制正德年間該操江都御史范鏞奏請本浦守禦官員應否

聽其節制該兵部題奉欽依南京操江都御史設立已久事有定規不可增損合無本部移咨南京兵部查勘浦子口五衛果係沿江要害地方未設守禦之先俱係操江管轄就將守禦指揮聽受都御史節制若自來不係操江管轄宜從照舊不必更改等因具題又該兵部覆議題奉聖旨准議咨部通行遵照嘉靖二十三年又該南京兵科等科給事中萬虞愷等奏為陳愚見重操江以固祖宗根本重地事奏內開稱新江口近在城外

則屬操江而浦子口遠在江北反屬兵部操江節制但
行於新江營而不行於浦口營形勢相依事權不屬萬
一江上有事則新江口有孤立無援之勢而浦子口得
坐觀推避之安若得隸操江聽其節制與新江口相為
應援此誠歸一事體頗切江防等因奏奉聖旨兵部知
道欽此欽遵該部議擬題奉欽依備咨前來又該本部
尚書宋景等會議得應天等五衛官軍設立浦子口營
操備防守與京城各營事體相同且南京據有江險而

守險當不止於江洋是以南有新江口水操以備上下
二江之警北有浦子口營五以遏淮鳳陸路之衝水陸
操備不同均為拱護南京而設各有專責不無深意設
立以來止聽南京內外守備參贊衙門節制續又聽科
道及本部委官點察控制之司不為不多糾察之法不
為不詳且無江操器具而徒屬操江管轄恐於事體無
益適使衛所多事況先經覆議照舊不必更改奉有欽
依遵行年久臣等似難別議題覆通行遵照外今該前

因通查案呈到部臣會同南京都察院署院事右副都御史王守南京吏科署科事南京戶科給事中李萬實南京戶科給事中李萬實南京禮科給事中鄭維誠南京兵科給事中甄成德南京刑科署科事南京禮科給事中鄭維誠南京工科給事中林懋舉南京浙江道試監察御史張鑑南京廣西道試監察御史朱木南京四川道署道事南京江西道試監察御史趙錦南京福建道試監察御史李九功南京山西道試監察御史王民

南京江西道試監察御史趙錦南京湖廣道試監察御史歐陽震南京廣東道試監察御史金豪南京雲南道署道事南京福建道監察御史楊順南京貴州道試監察御史陳澤南京山東道試監察御史李尚智南京河南道署道事南京福建道監察御史楊順南京陝西道署道事南京湖廣道試監察御史歐陽震看得戶科給事中李萬實所奏要將浦子口守禦應天五衛官軍俱屬操江節制及浦子口指揮千百戶荒淫驕蹇軍之富


者安享於家貧者商販於外每遇操練顧覓應名甚者
禦貨乘機坐窩為盜二口事體既分安肯互相應援其
應否量撥操船悉聽該部酌處一節無非振揚武備輯
寧地方之意臣等議照我國家以南京都城根本重地
據長江天險分京城各衛官軍為五營在城三營神機
營大教場小教場京城之外二營江南設新江口水軍
以禦水寇江北設浦子口陸軍以禦陸寇水陸二軍南
北犄角互為聲勢使水寇不得以登岸陸寇不得以渡

江雖二軍不同皆以拱衛都城五營通屬內外守備參贊尚書節制設立以來永為遵守若以浦子口之軍撥船習水則水軍獨增而陸軍全無水戰未習而陸營已廢北來之寇何以禦之浦子口之軍既不可改為水軍則雖屬之操江亦為無益且操江官之職止以操演新江口水軍以拱衛都城為務其軍亦不得調遣他出本官欽奉勅諭操習水戰整理戰船振揚威武壯固根本是也故自設新江口水軍以來江海之寇衆寡不一未

嘗一經調遣其操江兼管巡江擒捕盜賊自有沿江一帶衛所有司巡捕官軍火甲人等賊勢重大又得通調沿江一帶衛所有司軍夫所屬不下數萬又何仰於浦子口之軍哉況係祖宗累朝舊制先後部院科道各官會題照舊累次奉有欽依難再別議其指揮等官荒淫驕蹇等弊誠或有之則申明先年題准比照京營事例科道官及本部委官不時點查嚴加禁約各官如有縱放軍士安享商販顧覓應名者其實叅問其有乘機坐

窩分贓者犯出依律重治本管官員受財故縱者一體治罪再照新江浦子二口皆係京營今新江口之軍每年春秋操期守備參贊諸臣各一次閱操嚴行賞罰則浦子口之軍當春秋操期內外守備參贊官亦合各一閱視嚴行賞罰如此則舊制不至於更改而我務亦不至於廢弛矣伏乞勅下該部再加詳議上請定奪緣係陳愚慮以奠江防以固重地及奉欽依內事理未敢擅便為此專差親齎謹題請旨嘉靖二十八年六月二十

五日



苑洛集卷十六